

東
華
續
錄

東華續錄

咸豐七十九

臣王先謙敬編

臣陶澐宣恭校

夏四月丙午朔 上還宮○諭軍機大臣等昨據譚廷襄奏俄夷

不遵興安嶺分界舊約欲另以烏蘇哩河綏芬河爲界等語當經諭知譚廷襄告以興安嶺分界載在會典其烏蘇哩河綏芬河此間無從知其界址難以懸斷黑龍江見有欽派大臣仍應到彼查勘諒譚廷襄等當已妥爲曉諭該夷既稱已行文伊國辦理其所稱木拉幅葉幅自卽係木哩斐岳幅本日已諭知奕山如其真心查辦卽與秉公會勘儻肆意侵占亦止能隨時防範普提雅廷之意既以分界爲重務當曉以此事斷不能在津議定實緣道遠無可懸揣至未分界址之地止有烏特河一處上年文內亦經允其

查辦其見在所稱各河必在黑龍江方能查知如果所言有理奕
山亦必不强駁若不論情理則天朝疆土豈容尺寸與人乎至進
京之說亦未必是其本心不過因從前曾有進京之人欲借此誣
我廢棄和約不知雍正九年議定章程皆爲該國貿易人來京而
設並無使臣進京之例況皆由張家口陸路而來亦無由天津前
來之事何得謂我廢棄和約該國通商向止恰克圖一處道光三
十年已增伊犁塔爾巴哈台兩處今復許其海口通商此皆從前
條約所無今反責中國廢棄條約其優待於條約之外者豈不知
耶此中操縱該督等諒能洞曉機宜經權互用妥爲籌辦將此由
五百里諭知譚廷襄崇綸烏爾棍泰並傳諭錢忻和知之○丁未
諭內閣和春奏逆匪被圍出撲節經痛剿獲勝一摺金陵賊巢經
官兵圍剿三月初二等日南門一帶突出悍匪撲營張國樞派戴

文英等迎截周天培等鈔擊李若珠等督戰斃賊無數餘皆奔潰
七橋竇又出賊數千我軍三面兜圍該逆四竄潛匿戴文英追剿
直抵外濠燒毀更樓數座斃賊千餘名砍取首級百餘顆我軍復
設伏誘賊李若珠等從間道直薄賊巢張國樑督隊迎擊直薄南
門斃賊無算雨花臺印子山出賊五六千我軍四面兜殺該逆抵
死抗拒戴文英槍斃黃衣騎馬賊二名張國樑親督王浚等鈔截
水西門又出援賊二千餘蔡其榮等夾擊共計斃賊二千餘名砍
取首級三百餘顆奪獲刀械旗幟甚多此次痛剿逆巢大獲勝仗
該逆潛伏不敢復出著和春等乘此聲威督飭將弁迅拔堅城盡
殲醜類以慰盼望○諭軍機大臣等福濟奏和含喫緊請飭德興
阿迅派勁旅進紮烏江等處並請飭勝保袁甲三准令黃元吉帶
兵赴臨淮防堵等語前因和州需江北兵堵扼已據德興阿奏稱

浦口情形緊急不能分兵前往惟見在姥下河賊眾欲撲和城西梁山竄匪四五百人又分踞南義張公橋各處勢甚猖獗雖經福濟派兵交塔思哈帶赴和含會同惠成等攻剿而兵力尙形單薄仍著德興阿體察情形如九洑洲一帶賊營已漸次削平可以撥兵進紮烏江芝麻河等處即可與惠成等會剿儻見在兵力實無可分仍俟埽蕩九洑洲後節節進剿一面飭令舟師上駛聯絡聲勢以期得手至臨淮爲南北咽喉糧餉要道見有從六安竄回之捻首張瀝等糾眾數萬攻破王莊等處占踞朱家莊距臨淮僅四十里情形萬分喫緊自道員黃元吉一軍調赴六安該處僅存壽州兵百餘名連福濟所派參將尹善廷等帶往兵勇統計不滿千名難敷攻剿見在六安一帶勝保所帶兵勇萬餘袁甲三又幫同籌辦兵力已厚黃元吉有地方之責所部兵勇著勝保等卽飭該

道帶赴臨淮防剿以便與伊興額等前後夾擊肅清北路將此由
六百里各諭令知之○諭晏端書奏衢州續獲勝仗並近日軍務
情形一摺前因逆匪於衢州分布賊營意圖圍困並分股擾及常
山曾諭令福興分投防剿以保浙疆見在衢州官兵雖屢次獲勝
而賊勢未衰內犯之路處處可虞福興兵力已厚若止知保守衢
州不思杜其旁竄之路必致貽誤大局晏端書以廣信玉山節節
空虛常山開化二縣業已隔絕前次諭旨早經慮及此時福興惟
當趕緊將東北兩路布置周妥與周天受饒廷選等督率兵勇節
節進剿使該逆不至蔓延克復江山再圖進兵福興俟衢州賊勢
稍退仍當繞道回防玉山廣信等處方爲妥善石逆已至衢州撫
建之賊傾巢而出前諭耆齡酌調劉長佑等跟蹤追剿未據覆奏
見在撫建旣已空虛大有可乘之機耆齡如有兵可撥卽著疾趨

撫建攻其不備卽或一時未能攻克亦可牽制賊勢使不敢深入
浙疆本日據王懿德奏浦城失後政和松谿復失建甯大勢可危
閩浙交界處所賊勢猖狂石逆又素稱驍悍未可因小勝而恃爲
無患福興所調江西兵耆齡何以屢催罔應豈不知浙省爲東南
大局所關耶前諭江南江西兩路官軍歸福興調度徽州浙江兩
路官軍歸周天受調度福興如往江西所有江南撥來兵勇卽歸
周天受調遣江西續到兵勇著福興商同晏端書酌量布置務須
統籌全局毋稍大意和春續撥參將和順等帶兵千餘名晏端書
令其暫在嚴州駐紮仍當隨時察看情形相機調度不可以敢戰
之兵徒爲防守之用其金華一路該撫仍飭余萬清督練嚴防毋
許疏懈將此由六百里各諭令知之○御史孟傳金奏我朝建有
圓明園列聖相承於此勤求政務非以侈遊觀也但今昔時勢

不同伏願 皇上憫時事之艱難勿以故事而不爲變通得旨
宮在園原無二致若心耽逸樂何地不可朕兢兢素志在廷諸臣
諒當共悉該御史身列諫垣爲日不久或有不能體驗之處況京
師人心每易浮動稍有改常必流言四起其餘識見拘執之處亦
不足與辯○戊申諭內閣勝保奏註銷升階代弟贖罪等語勝保
之弟廉保因案遣戍本屬無可減免惟念勝保帶兵勦賊宣力戎
行伊母年高無人侍奉廉保著免其發遣勝保前經奉旨以都統
遇缺題奏之處並著毋庸註銷用示朕眷念勤勞施恩格外至意
○諭軍機大臣等譚廷襄等奏體察夷情見籌撫馭一摺並片奏
俄夷欲由陸路赴黑龍江復代各夷要請進京等語俄夷以見無
船隻水路難行爲詞故爲迫促之語分界一事已越數年日久耽
延何此時忽形急切見已加恩准其在海口通商則通商自爲先

務彼處之事見有木哩斐岳幅經理若能寄信伊國秉公勘辦固爲妥善否則不必與聞竟將通商事宜赴各海口妥爲料理得需利益亦不負天朝加惠之意分界一事查勘需時恐其耽延通商可將此意告知普酋竟不必派人親往至外國人進京皆係朝貢陪臣若通商各國原因獲利起見近年海口事宜均在廣東定議卽康熙年間與俄會議互市亦均在邊界定議從無在京商辦之例實與體制不合上年普酋請許來京尙且因接待禮節向無章程令其停止何況英佛稱兵犯順尤非恭順之國可比此次准其接見大臣已屬格外豈能再准進京見在減稅增口大皇帝優待外國已盡其道普酋若不能說合止可聽英佛回文如不講道理中國亦不以禮待譚廷襄等亦已盡其力量不能再辦矣儻英佛等以獲利無多更有奢望總告以不能再行奏請其權總在廣東

如減稅一事可多可少非天津所能定議總須與廣東新任欽差商議也米利堅欲遞國書前已准其呈進此次必欲見有上諭方肯呈遞著譚廷襄等告以天朝體制凡非朝貢之國偶有國書往來均有定式從不加以傲慢況今米國彼以禮來我以禮往儘可無庸疑惑譚廷襄等可摘錄此數語告以奉到諭旨可也總之稅則輕重貨物貴賤非各海口不能知廣東福建添設小口亦必須到彼察看地方始能指定何處不過天津已許之事天朝斷不食言其詳細節目尙待外省商定而大局決無變更將此由五百里諭譚廷襄崇綸烏爾棍泰並傳諭錢忻和知之○勝保袁甲三奏_臣等前獲逆首李兆受家屬因聞該逆有投誠意將逆屬暫交地方官監禁令其戚屬盧恩照持諭前往曉示並派縣丞姜錫恩同往曉以利害並諭從前所犯罪不容誅如能將六安舒城退出

或將首逆擒獻以明心迹當爲奏寬罪名並許隨營效力旋據姜錫恩等同營帶來該逆稟函內稱粵逆令其專攻河南因感再造之恩矢不北犯卽當南移舒城以俟大兵進攻時將桐城舒城廬江三邑獻出尙有所屬賊兵萬餘見住金陵之周村橋亦卽設法令其撤退並據姜錫恩面稟該逆聞知家屬尙存感激無地其投誠一節似非僞託查該逆罪大惡極如果真心悔悟必待其立功方可格外原赦見旣遞稟投誠聲言南去不妨因勢利導示以坦懷臣等正在督兵分紮節節進逼六安迅圖克復城垣卽可移師直擣舒桐斷不因有此一稟稍存疏懈之心一面示以羈縻離其黨與仍隨時嚴密防範不至墮其狡謀 上諭本日據伊興額等奏擒匪蔓擾勢愈猖獗請撥重兵勦辦並據勝保奏該營兵勇未能再行撥赴北路並請飭李孟羣速赴六安各等語前因徐宿情

形喫重德興阿等存營兵勇無多難於調撥諭令英桂卽飭德楞額朱連泰迅撥兵勇與徐州官軍聯絡進剿見在捻首任乾劉添幅等竄擾靈宿等處進徧徐州復有捻首韓狼子等由六安固始陸續竄回以致蒙亳懷宿四五百里之內徧地皆賊穎鳳伏莽復思蠢動伊興額等所帶兵勇不敷剿辦惟此時江北官兵旣難分撥勝保進攻六安正當喫緊且遠在南路其勢亦難兼顧惟鹿邑竄匪業已擊散河南邊防較鬆著英桂卽將前調陝甘兵二千名內酌撥一千名另於豫省營兵及英桂軍營兵內酌調一二千名派得力將弁帶赴徐宿協剿以資得力袁甲三辦理三省剿匪事宜於該處情形熟悉著卽酌帶兵勇馳赴徐宿統轄調度毋任再有蔓延捻首李兆受家屬經勝保拏獲並未加害該匪感恩乞降如果出於至誠則設法籠絡俾得效用亦屬權宜之計惟究恐狼

子野心仍不可過於信任或致墮其術中見在商固肅清六安攻
剿喫緊著李孟羣卽統所部剋日前往六安隨同勝保進剿毋稍
延緩將此由六百里諭知英桂勝保袁甲三並傳諭伊興額史榮
椿李孟羣知之○諭邵燦庚長奏捻匪竄越徐境添調兵勇堵剿
一摺徐宿一帶軍情緊急本日已諭知英桂撥兵助剿復諭令袁
甲三帶兵馳赴徐宿統轄調度邵燦等因伊興額史榮椿兩軍皆
在賊後派委副將鶴齡等帶兵前往睢甯援應所辦甚妥但兵力
較少仍恐不敷抵禦河南兵勇到營亦尙需時務須飭令該員等
實力堵剿一面催提河南官兵星速前進山東相距較近本日已
諭知崇恩派兵防守邊界偵知北竄卽飭越境會剿至請撥餉需
亦諭令山東山西解銀接濟此項餉銀未到以前仍著邵燦等設
法源源接濟或有可以那墊之款先行撥解卽於撥款到後歸還

俾毋貽誤將此由六百里諭令知之○諭伊興額等奏匪勢猖獗請添兵進剿並飭山東山西按月各撥銀二萬兩濟餉一摺皖省六安州捻匪竄擾宿州之大店驛時村及靈璧五河泗州一帶勢甚鴟張本日已諭英桂等分撥官兵前往會剿儻餉需不繼必致貽誤事機著崇恩常績各就該省情形酌量撥解卽不能按月接濟著卽先行籌撥銀數萬兩迅速派員解赴徐州糧臺交伊興額軍營應用毋稍遲延至山東江蘇境界毗連本日又據邵燦等奏捻匪繞過徐州擾及東路甚爲喫重崇恩前派遊擊保德帶兗州兵五百名前赴徐州助剿此時自未便調回並著酌派弁兵先行駐紮交界地面偵探賊蹤如將北竄卽飭出省會剿毋令蔓延入境將此由六百里各諭令知之○英桂因病請假以瑛棨暫署河南巡撫並接辦防剿事宜

由布政使署

○己酉 上幸圓明園○安徽

布政使李孟羣奏軍餉支絀請飭部議解並擬繞道赴廬先行到任與撫臣合盤計畫得旨昨已令汝隨同勝保進攻六安著仍遵前旨迅速啟程勿稍遲延所請協餉之處著戶部速議具奏此摺隱約其辭想部勇已譁譟難禁曷不卽行據實具奏○庚戌諭內閣吳振械奏勦辦威甯土匪疊獲勝仗首逆被殲一摺貴州威甯州匪徒李廣沅聚眾滋事經吳振械督飭總兵常山等勦辦於威甯州得著地方斃匪二百餘名生擒宋長潰等該匪竄至鎮雄之彝良戈魁毛坪雙山等處兵練疊次兜勦復斃匪三百餘名生擒蔣大五等匪眾回竄威甯被兵練於楊柳樹地方將首匪李廣沅殲斃餘黨悉數解散仍著督飭該地方文武將逃散零匪搜勦淨盡毋畱餘孽○諭吳振械奏回匪攻陷府城見籌勦辦一摺雲南大理回匪蔡七二等率黨數千人攻撲順甯府城署知府吳人彥

委令署順甯縣知縣汪堃帶練防堵該匪分股攻撲營盤另股直撲郡城句結城中回匪內應城池失陷該督已咨文祥督飭永昌右甸文武就近應援並飭汪堃揀派土司夷練會同攻剿著卽迅速克復郡城無任負嵎久踞○諭軍機大臣等譚廷襄等奏夷情遲難就撫一摺該夷堅請進京不能允准之處已於初三日寄諭並批摺內詳細指示該督等尙未接奉又爲此奏未免過涉驚惶見在英佛尙無回文自應待其回覆然後斟酌奏辦譚廷襄等屢以允其進京爲請直似此事一准其餘遂可不煩講論英佛所重者在利未必全重此事亦當分別觀之此時俄米均未允准何況英佛且看其回文如何如必以實情不能上達爲憂再可告以此係遠慮尙在他時若論目前之事必須到廣東商辦設或日後廣東有不辦之事尙有福建兩江總督浙江巡撫皆可請爲代奏不

至再有阻隔至謂增口岸賠捐累從前已有之事從前所以認賠者因中國燒其煙土二千箱此次則該夷自行縱火燒我民房彼在應賠之例俄米兩國均在天津自有公論中國認賠實屬無名至口岸自通商以來十餘年未嘗議增今已准其酌加二處該督等何得謂以近年辦法敷衍了事耶歷次寄諭至詳且盡譚廷襄等但當悉心體會不可急遽圖成其減稅增口二事須與言明俟廣東事了結後方能辦理至欲拒以兵力亦經疊次示諭如果該夷先開槍礮斷無不行還擊之理該督等慎勿輕聽帶兵將士之言意在邀功而不思後患也將此由五百里諭譚廷襄崇綸烏爾棍泰並傳諭錢忻和知之○諭德興阿等奏派兵馳援和州並州城已被賊匪竄陷見在整隊前進各等語和州既復之後賊蹤出沒又復竄入其城北香泉集及城東北黃泥壩地方均有賊匪副

將惠成營盤被困業經德興阿派成明等分帶馬步隊三千名馳往救援並添派馬隊一百餘名步隊八百餘名由鞠殿華親督前往加以和州見有之兵勇三千餘名兵力已不爲薄此時計已雲集城下自可以剿散圍營之賊會同惠成鮑雲翥等相機攻復州城江北兵止有萬餘見在九洑洲攻剿正在喫緊前已撥兵二千名赴江南大營嗣又撥兵六百餘名往援徐宿此次因和州毗連江浦撥兵策應斷不能久畱守禦況廬營月餉多於江北兵力較厚福濟等豈能專恃鄰省援師而擁重兵以自衛著卽撥兵迅赴和州援應俟克復後鞠殿華等撤兵回至江浦卽著福濟等派兵守禦和州毋得再蹈從前覆轍將此由六百里各諭令知之○于雲南殉難知府吳人彥等祭葬世職○辛亥諭軍機大臣等福興奏衢州剿賊情形並晏端書奏常山開化被擾見籌分路進兵各

一摺福興專辦江西東路軍務不能力攻撫建致賊眾傾巢內犯分擾浙疆見在賊蹤擾及龍游已在衢州之下雖擊回遂昌而旁竄金華處州皆可直達省城福興擁重兵於衢州城外而下游扼勦之兵僅止三千餘名是又蹈從前株守信郡不顧廣豐之故轍本日已命周天受督辦浙江防勦事宜會同晏端書通籌全局分投布置衢州守禦事宜見有饒廷選繆梓藩辦而常開一帶尙屬空虛李元度一軍在玉山駐紮勝負未有消息且已在常山之外恐其兵力較單未能進勦著福興卽將原帶官兵五千餘名酌留一半交周天受調遣其餘一半卽親自統帶回駐玉山以杜續來之賊並著就近勦辦常山賊匪儻再有貽誤自問當得何罪周天受既經統領全軍事權歸一卽應擇要布置會同晏端書妥爲調度無稍疏虞衢州存兵尙屬不少卽責成饒廷選嚴加防守相機

出勦以清浙境將此山六百里各諭令知之○諭本日據德興阿等奏援勦和州之兵大獲勝仗俘斬數千兇鋒少挫惟賊又分股撲全椒滁州亦爲震動情形十分緊迫兵勇不敷分布請飭皖省迅籌堵勦等語賊眾分撲全椒已越和州而北設有疏虞勢將蔓延北路所關非細著福濟等迅卽派兵馳往全滁一帶截擊保護全椒遏其北竄再於全和要隘駐兵扼守以固藩籬毋得稍有貽誤至此股賊眾係由蕪湖渡江會合巢縣無爲州之賊從含山竄入和州分犯全椒徧地賊蹤毫無闌阻總由福濟株守廬州按兵不動爲日旣久以致養癰貽患此時若再不能力扼要衝任賊長驅北犯自問當得何罪德興阿江北防勦喫緊鞠殿華等已勦除和州賊匪自應帶兵回至江浦儻聞全滁緊急仍著撥兵協勦將此由六百里各諭令知之○賞署福建漳州鎮總兵官周天受提

督銜督辦浙江防勦事宜○王子諭軍機大臣等黃宗漢奏探訪
夷船欲赴天津請勿加峻拒一摺所奏與近日辦理情形適相符
合自二月三十日起陸續駛到火輪船二十九隻艇船三隻均在
海口停泊閒有小船駛入攔江沙內尙不滋事亦不騷擾海運船
隻見派譚廷襄崇綸烏爾棍泰馳往大沽與之接見妥爲開導復
派國瑞珠勒亨富勒敦泰酌帶京兵前往暗地設防備而不用疊
據譚廷襄等奏報俄米均來接見英佛則僅有照會來往俄所求
者一爲黑龍江分界一爲請准五口通商米所求者以索賠平日
損失貨物請添浙江福建廣東口岸欲補遞前年福建所遞國書
三款爲大宗其餘皆係枝葉俄請分界許其往黑龍江查勘五口
通商准英夷等一律辦理米遞國書已准呈進並准於廣東福建
附近大口處所各添小口一處又欲減該國貨船噸鈔皆准令回

廣東酌議詳細章程至佛夷所開十條皆由俄轉述其索賠兵費一條欲於內地江河貿易一條廣行天主教給與照票任其行走一條派員進京一條多與英同已令譚廷襄等據理拒絕惟酌減稅則一條英佛米皆有是請尙可量准亦令譚廷襄諭知令其回粵聽候酌議至佛夷於廣西西林縣一案猶嘵嘵不已此則不過將來再費一番查辦無足重輕以上各條自厯次理諭後英佛尙無覆音且俟其如何答覆再作計較俟有定議再行諭知該督也

○諭黃宗漢奏閩省自行使鐵錢錢賤糧貴貧民困苦三月中南臺一帶因海防廳辦理團練未洽與情激成眾怒勢甚洶洶相率以錢法糧價爲詞入城至前尙書廖鴻荃家嚷鬧旋至督署經將軍東純等懸牌許以搭用銅錢並倡捐糧石半賑半糶始各散去等語此等愚民固爲飢寒所迫而動輒聚眾挾制官長其風亦斷

不可長閩省外寇未平何堪內患更作著王懿德等察看情形如該民人等已安靜如常即可憫其阨窮不必繩之以法如再挾制把持卽將爲首一二人嚴拏懲辦以儆效尤至此事旣經該民人等厯控各衙門何不早爲變通籌畫而海防同知因辦團激變亦當加以參辦再此次江西逆匪竄擾閩疆前據奏報浦城松溪政和等縣先後被匪攻陷建陽麻沙等處均有土匪滋擾經該督等飭臬司保泰等赴建郡調度並派員分投剿擊嗣後各該處辦理如何見在該匪竄擾浙疆常山開化相繼失守杭州頗爲緊急所有閩省失陷各縣曾否克復建郡能否保守著將見辦情形迅速馳奏將此由五百里諭令知之○癸丑諭內閣西安將軍福興前在江南失陷營盤業經革職畱任拔去花翎此次督兵防剿又復遷延貽誤著卽革職仍暫行畱任帶兵剿賊以觀後效○諭軍機

大臣等勝保袁甲三奏擊賊連勝請飭英桂撥兵助剿一摺六安逆匪於州城西南分股盤踞經勝保等督軍攻剿殲賊甚多並踏平賊圩十座其河東一帶亦經官軍堵剿獲勝見已移營進逼城下務當晝夜環攻迅圖克復所請飭令豫省撥兵前因伊興額奏捻匪蔓擾不敷剿辦已諭令英桂將前調陝甘兵二千名內酌撥一千名赴徐宿協剿尙餘陝甘兵一千名卽著勝保催赴六安以資攻剿另片奏粵逆竄踞麻城楚兵均在東西南三面北路空虛恐該逆由此竄突已諭知官文等合圍兜剿見在邱聯恩已帶兵馳赴光商勝保仍當迅咨該總兵扼要堵截毋任竄擾豫疆至徐宿捻匪勢甚披猖袁甲三於該處情形素本熟悉著卽遵照前旨酌帶兵勇馳赴徐宿統轄調度毋稍遲延本日又據德興阿奏和含賊匪於三月二十八日竄撲全椒該縣失守滁州亦卽被陷竊

同書鞫殿華已帶兵追剿本日並諭福濟等迅速分兵助剿矣該處清流關爲南北咽喉前此賊匪北竄卽由滁州入豫見在臨淮有黃元吉等帶兵會攻五河著勝保添撥兵勇卽由臨淮進扼滁州後路以杜北竄將此由六百里諭令知之○諭前據官文等奏粵逆竄陷麻城該大臣等調派水陸官軍前往攻剿本日據勝保等奏賊踞麻城楚兵進剿在東西南三面惟北路空虛恐該逆北竄等語麻城與豫省光商一帶節節毗連該處甫經被擾若該逆乘虛北竄又被蹂躪李孟羣既赴六安惟邱聯恩赴光州防堵所帶兵勇爲數無多官文等見調水陸馬步各軍分道進剿自應四面兜圍爲就地殲除之計克復麻城後如有旁竄餘匪務跟蹤追剿杜其北趨將此由六百里各諭令知之○諭本日據德興阿等奏和州含山賊匪撲陷全椒縣卽有騎馬大股賊匪竄至滁州尋

亦被陷等語見在賊踞滁州城內來安等處情形喫緊並有窺伺六合之意連日烏衣東葛西葛及附近六合之張家崗來安之各鄉鎮均有賊蹤若不乘勢殲除不特來安六合可慮並恐清淮一帶震動前次賊匪北竄卽由清流關入豫於大局殊有關繫見在翁同書鞠殿華已帶兵追剿著福濟迅速派兵繞出滁州後路併力剪除毋令深入貽誤事機本日已諭勝保酌派兵勇由臨淮一帶會扼滁州後路惟該處距滁州較遠黃元吉因五河失陷帶兵會剿恐兵力不敷仍著福濟會同德興阿等迅圖克復以杜北竄將此由六百里各諭令知之○賞前任江甯將軍托明阿三等侍衛赴密雲副都統勝保軍營隨同剿賊○甲寅譚廷襄等奏本日卯刻夷船聯絡並進投遞文書卽料其欲行肆擾午刻夷人開礮攻擊礮臺雖經擊壞夷船四隻詎夷船聯絡直上闖入內河轟傷

兵勇礮臺被占奏入命譚廷襄嚴飭提督張殿元副將達年扼要堵禦設法攻奪礮臺崇綸烏爾棍泰督率津郡團練激勵民心實力防守○命科爾沁親王僧格林沁酌帶兵勇赴通州一帶防堵○賞三等侍衛托明阿頭等侍衛馳赴天津會同譚廷襄辦理夷務○調熱河察哈爾綏遠城官兵各一千名密雲官兵五百名馳赴通州防堵○調察哈爾備用馬二千匹迅解南苑牧放並令另選馬二千匹備調○乙卯諭軍機大臣等前因六安攻剿喫緊令李孟羣剋日前往隨同勝保進剿茲據李孟羣奏畱兵駐守商城以待川餉等語六安捻匪困守州城西南一路空虛勝保節次催調該藩司進剿以圖規復城垣嚴防旁竄見在邱聯恩移紮白雀園商城南界已派都司楊光澤駐紮路口卽著就近歸邱聯恩調遣以固豫境邊防李孟羣著仍遵前旨卽帶所部兵勇剋日前赴

六安協同勝保勦辦見在兵勇無多所帶口糧卽可就地設法籌措以利軍行不得以待餉爲詞遷延貽誤○命於順天通州設立糧臺濟科爾沁親王僧格林沁軍營需餉○以祥裕爲甘肅按察使

由鎮迪道遷

○丙辰諭軍機大臣等前據德興阿等奏和含賊匪竄

陷全滁翁同書鞠殿華帶兵進勦當諭福濟派兵繞出滁州後路堵剿本日該撫等奏和全失陷請添兵催餉一摺並片奏請調撥馬隊等語滁州爲南北咽喉清流臨淮均屬要隘務須及早攻克全滁方免北竄之慮福濟株守廬州並不兼顧致有此失見在德興阿等已分兵追剿著福濟卽遵前旨撥兵會剿毋得再有貽誤五河業已收復黃元吉所帶兵勇亦可由臨淮兼顧清流德安甫到卽趕往東路堵剿而廬州一帶賊氛尙近鄭魁士著准其暫畱廬城會同福濟商辦軍務俟德安回廬再行交卸李孟羣一軍本

令赴勝保大營會攻六安見在廬州勦辦喫緊著勝保等卽飭該藩司帶見存固始兵勇迅赴廬州所有該藩司前派往六安之廬又熊等各營兵勇仍畱勝保軍營調遣俟六安克復再行酌撥前往廬州至德興阿軍營馬隊歷次因病遣撤並無二千名之多見在翁同書等分勦全滁卽須應用無可分撥著毋庸議將此由六百里諭知勝保袁甲三福濟德安鄭魁士並傳諭李孟羣知之○譚廷襄等奏礮臺失事情形並俄米仍願說合懇准羈縻奏入命譚廷襄查參首先潰敗之員及查明招集兵勇若干其英佛所求各款遣使進京及傳教夷人在內地游行兩事斷難允准此外利之所在奏聞斟酌辦理○以督辦防務調度無方革直隸總督譚廷襄職拔花翎仍畱任○以安徽和州全椒被賊竄陷巡撫福濟下部議處○丁巳諭軍機大臣等本日早間因譚廷襄昨有請調

京兵之奏特命僧格林沁等俟密雲兵到通州時卽飭赴天津頃
又據譚廷襄等來報據稱沿河兵勇萬難阻遏仍請添調京兵復
諭知僧格林沁等俟察哈爾官兵到通再派員管帶赴津一併歸
托明阿分撥布置矣惟此二項官兵一時未能到齊國瑞珠勒亨
富勒敦泰所帶馬步隊京兵本有二千何以不聞接仗亦不見其
扼守何處要隘見在僧格林沁所帶京兵原爲京師保障豈能盡
赴天津若如所請則國瑞等所帶皆不足恃豈有如此辦法此項
京兵卽有傷亡爲數當尙不少加以張殿元達年皆有本標之兵
何至如此一日數驚張皇無措托明阿久歷戎行素稱勇敢此時
當已抵津卽著妥籌調度該夷見雖乘船駛進而陸路亦應嚴防
若以步兵練勇防河路而以馬隊防陸路布置更爲周密富勒敦
泰等業已降旨革職卽國瑞珠勒亨一同退卻亦難辭咎若再不

力爲防禦或致別有疏失自問當得何罪前譚廷襄屢次奏報總
言兵勇聲勢甚壯迨一經潰敗卽毫無籌畫事前旣無布置今又
如此恒怯卽使再添精兵何能有益著卽與托明阿國瑞珠勒亨
等妥速籌辦務使郡城得保無虞方可徐圖議撫若再有貽誤致
失機宜朕惟執法懲治不能寬貸也將此由六百里諭譚廷襄崇
綸烏爾棍泰托明阿國瑞珠勒亨富勒敦泰並傳諭錢忻和知之
○以天津礮臺失守革副都統富勒敦泰提督張殿元總兵官達
年副將德魁職仍畱營督帶兵勇○予江蘇陣亡知縣葉松年祭
葬世職○撥密雲兵五百名赴天津防守○戊午漕運總督邵燦
等奏銅山雖甯捻匪回巢淮南賊燄復熾見抽調兵勇扼要嚴防
得旨蔣壩之防最爲緊要雖兵勇未免單薄然須慎固藩籬以保
北路○江西巡撫耆齡奏副將遮克敦布復零都道員張運蘭知

府王開化總兵普承堯復樂安宜黃道員蕭啟江知府劉坤一王
開化復崇仁合圍撫州報聞○庚申諭軍機大臣等英桂奏擒匪
偪近歸陳派兵堵剿並瑛棨暫緩出省一摺頴毫擒匪四出竄擾
見經豫省堵擊竄往東南而匪蹤飄忽難保不復行窺伺歸陳兩
郡防務實爲喫緊雖經英桂派令德楞額趙書升等前赴太和剿
辦並令遴派兵勇駐紮毫境策應惟並無大員督率深恐呼應不
靈致有貽誤見當上忙開徵督催固屬緊要惟此係署任藩司專
責且英桂雖在請假於省中一切事宜仍可擇要調度著該撫等
斟酌情形如軍務喫緊卽著瑛棨出省赴歸陳一帶督剿至蒙毫
等處匪勢蔓延旣經該撫派令德楞額等往剿卽著嚴飭該總管
等迅速前進會同江皖官軍實力兜擊毋許遷延株守致誤事機
將此由六百里諭令知之○譚廷襄等奏洋人大小火輪船七隻

帶舳板多隻直入內河先經沈船下石堵塞不料夷船乘潮而上仍復開通居民遷徙兵勇潰散扼守北河及分布近城地面之兵爲數無多見在導水旁洩以涸其船奏入命譚廷襄等設法抵禦僧格林沁瑞麟於天津以北密爲防備妥籌辦理○辛酉諭軍機大臣等本日據何桂清會同和春等奏浙東賊勢蔓延瀝陳渙散情形一摺朕前閱晏端書所奏常山開化連被賊擾卽知福興統兵不能得力特加周天受提督銜督辦浙江防剿事務各路援浙之師均歸調度並諭福興將原帶官兵五千餘名酌畱一半交周天受調遣其餘一半仍由該將軍督帶回駐玉山就近剿辦常山賊匪旣授周天受以統領全軍之責呼應較靈卽可由該總兵體察何路賊情緊急派兵往援福興雖援應衢州尙有微勞惟前此擁兵不戰致令賊匪蔓延業經革職暫畱本任以示懲儆見在

安告急並有失陷處州之信昨已據和春奏派周天培帶兵一千名前往應援此時援兵將次雲集合計兵勇已有二萬餘人如調度得宜足敷防剿至蘇杭唇齒相依和春已屢次添兵兼顧何桂清於餉糈亦能不分畛域通籌大局浙省軍務諒可望有起色也將此由五百里諭令知之○譚廷襄等奏十四日洋人火輪船直抵津關在後之船亦相聯而進並未上岸滋擾已令府縣往見請另派大臣前往共議奏入命大學士桂良吏部尙書花沙納前往查辦譚廷襄親督地方官妥爲安撫以固民心○壬戌官文都興阿胡林翼楊載福奏九江郡城自咸豐三年失陷被逆匪林啟榮占踞已閱六年屢經官軍剿辦恃險堅拒迄未得手六年十二月間浙江布政使李續賓從武漢乘勝追剿七年八月後湖口克復臣等添募勁旅以長濠六道三面合圍並分水師十餘營駐守北

面江岸賊援遂絕福建提臣楊載福廣東惠潮嘉道彭玉麟水師
晝夜環攻終爲礮石所阻李續賓審視大東門外磨盤洲地方偏
近城垣其中岡高並於城左右環抱如弓可於岡下潛開地道惟
立於岡頂則城上礮子如雨遂令各勇依岡形勢盡一夜之力培
土爲牆以槍礮對城轟擊隨立重賞挑選精悍勇丁分三處開挖
地道均於二月二十八日開工仍日夜列隊攻擊並搬運木梯多
張旗幟故作登城之狀以疑之三月二十五日東門地道轟塌城
數丈二十九日南門地道轟塌城十餘丈兩次均被該逆以大桶
火藥拋擲士卒多傷未得登城逆匪旋將缺口堵塞四月初六日
自東而南地道工竣李續賓復會商臣楊載福等陸師攻東南西
三面水師攻北門臨江一帶約於初七日寅刻發火飭副將沈俊
德參將劉連陞率勇從東南一帶以梯登城參將王載驄等率勇

從小東門一帶以梯登城水陸將士咸痛前此傷亡士卒之慘人盡思奮及期火發輒石飛騰山岳震撼轟塌地東並南面城垣一百餘丈李續賓飭王揆一等乘勢搶城騰越而上各勇奮氣百倍前者受傷後者繼進槍矛並舉該逆抵敵不住紛紛亂竄我軍截殺兩時之久城內勇掩殺而出城外勇衝殺而入自卯至午殲除淨盡僞貞天侯林啟榮僞元戎李懋潛各賊目於亂屍中認出寸磔梟示通計斃賊一萬六七千名九江府城卽於初七日卯時克復臣楊載福與彭玉麟會商先於是日派各營駐琵琶亭扼賊出竄之路其由小北門大北門及龍口河逃出賊各數百人均經水師登岸概行殺盡並無一賊漏網此皆仰賴 聖主威福知人善任李續賓等得藉手以告成功見應如何水陸分道東征臣等卽當妥速籌商辦理浙江布政使李續賓忠盡勤勞厥功甚偉應如

何加恩之處伏候 聖裁按察使銜廣東惠潮嘉道彭玉麟等戰功卓著應得獎敘先行開列籲懇恩施其餘在事出力文武員弁兵勇可否容 臣等另行查明擇尤保獎又奏李續賓忠勇誠篤其才力可統數萬之眾而並不以權術駕馭爲能良由待人以誠處事當理故能使士卒感恩所向成功卽如馬隊水師各有管帶偶與李續賓共事則彼此輯和互相策應又如 臣胡林翼撫標勇丁一萬餘人歸其統帶無不心悅誠服樂爲之用竊計戡亂之略得賢爲本如李續賓之才識必可獨當大任爲國家之棟梁查皖省自三年以後賊匪久踞百姓流離失所賴毫壽春等處民賊久無區別皖省兵勇怯懦冗雜旋潰旋集勇賊亦無區別若不及時肅清後患滋大皖省形勢緊要目前大計自應以九江得勝之陸師渡江勦辦先清北岸而後再及於江南水師則先清安慶而以餘

力分討金陵或再以餘力調入蘇杭太湖等處此固全局所關不容稍分畛域者也臣都興阿所部兵力不多止能專顧一路而皖省地勢則必分兵三路乃能得力又必先剿安慶六安城外各處之賊俟各路剿殺已盡則安慶省城攻取自易否則頓兵城下動淹歲月而賊又於無兵及兵弱之處狡焉思逞此又兵機之必當審量者也惟李續賓越境遠征應否加銜專奏以一事權而免牽制出自 聖恩至此大克復九江李續賓應推首功楊載福亦勞績尤著惟均係一二品大員應候 聖裁 上諭內閣粵逆占踞九江負隅久踞自湖口攻克以後官文等添募勁旅空濠合圍賊援遂絕李續賓等督勇開挖地道本月初六等日轟坍城垣一百餘丈伏勇城中內外衝殺首逆寸磔梟示斃賊一萬六七千名九江府城卽於初七日克復其逃竄之賊概行截殺剿辦實屬奮勇

在事出力員弁兵勇著官文等查明擇尤請獎候朕施恩○諭軍機大臣等僧格林沁瑞麟奏抵通布置情形並請調黑龍江等處官兵一摺僧格林沁等於通州東關外運河兩岸紮營布置水陸兩路因所帶兵力尙單擬豫爲備調黑龍江吉林兩處官兵已諭令景瀉奕山各調五百名其哲里木盟昭烏達盟蒙古兵各一千名已諭理藩院咨調但天時漸熱恐於水土不服已令暫駐熱河矣昨派桂良花沙納前往天津籌辦夷務能否理論尙未可定設該夷另換小船由運河北駛我之礮力足以禦之著僧格林沁等在沿河一帶節節設防托明阿見在楊村駐紮並有珠勒亨馬步隊正可聯絡堵截以固藩籬譚廷襄毫無布置天津兵勇已不足恃所稱北河橫淺業已決口洩水層層阻滯著僧格林沁等悉心體察不可有名無實其通州負米人夫爲數甚多著嚴飭地方官

妥爲彈壓毋令滋事將此諭令知之○諭寄諭湖廣總督官文等
粵逆占踞九江久未攻克經楊載福等督兵不分晝夜水陸環攻
並開挖地道轟塌城垣將弁兵勇均各奮力先登將堅城克復剿
辦深堪嘉尙此時除分兵畱守九江外楊載福李續賓等統領得
勝之師分道東征應先往何處著卽乘此聲威妥速籌辦見在和
春等圍攻金陵屢獲勝仗尙屬得手惟因浙西告警江南屢次撥
兵至衢州助剿鄧紹良一軍亦因賊匪欲內竄東壩高淳一帶防
剿兼施兵力實形單薄九江兵勇共有若干如可分兵援應他處
卽著抽撥二三千名派委得力將備帶赴鄧紹良軍營聽候該提
督調遣既可防守甯國等處內竄之路設或浙中喫緊亦可調往
援剿楊載福等水師仍當迅速東下節節埽除卽可與江南師船
聯絡一氣一旦金陵克復太平蕪湖一帶竄匪必多此時先爲肅

清日後易於剿辦李續賓已加巡撫銜出境後准其專摺奏事將此由六百里諭令知之○調黑龍江吉林兵各五百名來京聽調哲里木盟昭烏達盟蒙古兵各一千名暫駐熱河聽調○以克復九江府城加官文胡林翼太子少保浙江布政使李續賓巡撫銜按察使銜道員彭玉麟布政使銜賞李續賓並福建提督楊載福黃馬桂餘加銜升敘有差○予江西吉安府殉節按察使周玉衡建祠子恩慶炎等附祀並賞其嗣祖父母本生祖父母父母二品封典○癸亥諭內閣德興阿奏官兵進剿來安縣城克復一摺皖匪竄陷來安經翁同書於四月初七日飭穆克登額等帶隊進剿踴毀南門外賊壘一座斬俘不可勝計初八日分三路進剿直撲城根鄧鳳林等立梯登城魁霖等焚燒城門馬步兵勇四面圍攻該逆抵死抗拒賊援紛至東北門出賊二三千名經鄧鳳林等分

堵斃賊多名富明阿等迎截賊屍遍野紛紛敗竄官兵追殺二十餘里斃賊無數翁同書督隊乘勝進攻該逆開礮抵禦我軍乘勢下城遂啟南門兵勇繼進內外夾擊共殺賊二三千名生擒長髮悍賊二百餘名立將來安縣城克復救出難民一千餘名此次進剿來安乘勝急攻迅拔縣城殲賊淨盡辦理甚爲妥速在事出力文武員弁等著准其擇尤併案奏請獎勵○諭勝保袁甲三奏攻剿六安逆匪屢次克捷請飭英桂迅卽派兵助剿一摺前因六安兵力尙單諭令英桂將前調陝甘兵二千名內酌撥一千名赴徐宿協剿尙餘一千名卽著勝保催赴六安嗣據英桂奏陝甘後起官兵一千名尙未到齊因六安緊急擬卽派赴勝保軍營是此項官兵日內計可馳抵六安勝保等卽可以資攻剿其撥往徐宿之陝甘兵一千名是否堪以調歸六安著英桂等酌量情形辦理見

在六安剿匪疊次獲勝功在垂成自應厚集官兵迅圖克復本日
已諭知官文卽令李續賓統領九江得勝之師先赴六安勝保等
得此勁旅兵力已厚務當迅克州城所奏山西兵一千名可畱交
朱連泰會合豫省官兵辦理太和一帶餘捻自可保固豫疆英桂
等仍當遵照前旨如歸陳情形喫緊瑛棨卽出省督剿毋任捻匪
分竄至袁甲三前已諭令馳赴徐宿一帶臨淮等處已諭勝保添
兵前往並著嚴飭黃元吉等竭力防剿由臨淮兼顧清流毋稍疏
虞將此由六百里各諭令知之○諭福濟奏懇陳苦衷自請嚴議
並片奏請飭德興阿等速撥馬隊及李孟羣全軍赴廬援應等語
本日復據德興阿奏皖營撥兵未到請飭該撫催令速赴全滁等
語福濟株守廬州不能出奇制勝牽制賊勢致令全滁等處相繼
失陷雖因地處當衝兵單賊眾而一籌莫展咎實難辭乃累次陳

奏軍情總以各路統兵大臣未肯協助爲詞如果他處兵力有餘
自宜分撥應援卽如六安被陷勝保李孟羣等越境進攻和全告
急翁同書鞠殿華移師往剿以及都興阿之進取宿太皆係皖省
地方並不稍分畛域該撫但知責備他人自問豈無愧耶前因該
撫奏請已諭李孟羣迅赴廬州軍營昨因官文等奏楚軍克復九
江府復諭李續賓等卽日東征先同勝保克復六安再往廬州等
處相度情形先其所急次第攻剿本日復據德興阿奏翁同書攻
克來安縣城勝保等奏圍攻六安大獲勝仗福濟果能與德安鄭
魁士李孟羣同心勦力勿徒專顧一隅可期漸有起色至來安克
復後鞠殿華等復於初四日在滁州以少勝多見在塔思哈攻剿
全椒亦獲勝仗著飛飭該員會同江北之兵兩省合剿以杜北竄
勿再延玩干咎將此由六百里諭令知之○諭官文等奏九江克

復已諭令楊載福李續賓等統領得勝之師分道東征應先往何處卽行安速籌辦本日據勝保等奏見在攻取六安屢次克捷功已垂成惟官兵僅有二千餘名不敷攻剿附近賊船尙有數百竄突堪虞所調豫省官兵又因歸陳防堵不能卽時前往須厚集兵力方可迅復州城福濟亦以廬州兵力不敷奏請添兵著李續賓卽帶九江得勝之師先行馳赴六安會同勝保奮力圍攻俟六安克復再赴廬州一帶相度情形先其所急次第攻剿該藩司奮勇過人乘此聲威諒必能所向成功其宿太一路賊匪並著都興阿迅速掃除毋令蔓延將此由六百里各諭令知之○以江蘇紳士郎中銜郁松年捐輸上海善後經費永廣松江府文武學額各十名上海文學十名武學九名並賞郁松年鹽運使銜○甲子諭軍機大臣等伊興額史榮椿奏捻逆分竄徐境請飭催援兵添調勁

旅一摺並請令傅振邦來徐等語徐州爲北路門戶捻匪分擾蕭
陽闌入豐沛勢甚猖獗恐由舊黃河北岸直趨徐城伊興額史榮
椿兵力不敷自應酌撥會剿前諭袁甲三帶兵赴徐宿一帶當此
軍情喫緊著卽迅速前往勿稍遲延傅振邦前在徐州屢著戰功
見在江南駐守灣沚著和春張國樑飭令該總兵酌帶兵勇千名
迅赴徐州應援其灣沚要地另派得力大員駐守毋少疏忽至伊
興額等請調吉林黑龍江馬隊見在各路軍營皆無可分撥其四
川川北建昌官兵道途窵遠更恐緩不濟急均毋庸議惟前諭英
桂撥陝甘兵一千名又令在河南各營內酌撥一千名前往徐宿
何以至今尙未前往昨據勝保奏調陝甘兵當諭英桂等酌辦見
在徐州賊勢鴟張著英桂瑛榮卽飭此項陝甘兵一千名仍赴徐
州毋庸調往勝保軍營此外豫省尙有可撥之兵並著就近酌量

調往以資協剿至山東與徐州接壤前據崇恩奏嶧縣邳城等處
添派防兵自千名至六七百名不等著崇恩酌抽此項防兵卽飭
得力將弁管帶出境交伊興額調遣以厚兵力伊興額史榮椿先
就見有兵力妥籌布置袁甲三及河南山東援兵到徐諒必迅速
也將此由六百里各諭令知之○調察哈爾續撥官兵一千名赴
科爾沁親王僧格林沁軍營聽候調遣○乙丑官文都興阿胡林
翼奏皖省大股逆匪竄陷麻城廣築堅壘以阻我師三月二十七
日李續賓督軍抵麻城後連日審察地勢與副都統舒保會商進
兵於四月初二日飭副將張文煥進攻各門賊壘李續賓自率湘
副中等營爲伏兵舒保自率馬隊往來策應該逆率眾抗拒我軍
極力勦殺連斃悍賊百餘人賊敗入壘兵勇奮往直前力攻三時
踏破北路各壘殺賊一千數百名乘勝攻破東路賊壘殺賊千餘

名西路官兵聞東北兩路得手愈攻愈力都司謝國俊等首先登
壘中礮陣亡各勇奮力衝入立將西路賊壘焚燬殺賊二千餘名
賊奔赴南門守壘張文煥奮不顧身大呼先登已入壘牆中礮殞
命各弁勇憤極猛攻擒斬悍賊千餘南路賊壘一律毀平統計是
日殺賊五千餘名生擒七百餘名查麻城踞賊勢甚猖獗經舒保
李續賓等合力攻勦埽平堅壘逆黨已寒仍飛飭舒保等激勵士
卒迅圖克復縣城副將張文煥等血戰陣亡均堪憫惻先行開列
擬請分別交部議卹 上諭內閣此次官軍攻勦麻城賊匪大獲
勝仗各路賊壘一律毀平勦辦甚屬得手著官文等督飭舒保等
激勵士卒乘勝迅克縣城盡殲醜類副將張文煥中礮陣亡尤堪
憫惻著交部照總兵例議卹○官文都興阿胡林翼奏九江形勢
西扼武昌東引皖口實南昌之頭目而湖廣江南之腰膂也得之

難守之亦不易應由鄂省留兵代防湖口彭澤小孤山華陽鎮均爲九江之唇齒湖口尤爲彭蠡之咽喉自昔經畫江南必以此爲重鎮亦應由鄂省分兵代守鄂省以五萬三千人戰於江皖不僅兵事無分畛域卽餉需亦不容推諉惟查九江地方善後事宜極有關係必得廉幹大員以資鎮撫且鹽課關稅經理得人亦可稍助軍需東征之師應於九江設轉運糧臺則軍餉軍火由鄂起運者中道有歸宿之處呼應較靈轉輸亦捷查有本任廣饒九南道沈葆楨忠直廉幹才堪應變見駐廣信府城應請旨特派沈葆楨辦理九江轉運糧臺並飭速回九江本任實於地方軍務均有裨益李續賓擬酌帶湘軍及撫標各營渡江先清皖北而後再議皖南皖省自宿太以及舒桐賊勢蔓延已久且與廬州文報不通楚軍遠征錢糧軍火均有本營長夫自行運送惟是深入皖境離江

岸較遠則米糧軍火轉運不易且李續賓每逢大戰必豫飭各營添募民夫趕運一月軍需故能與賊久持而操縱在手不虞匱乏客兵遠征若無地方大員隨同照料呼應不靈應請飭下安徽撫臣迅派廉明大員繞赴都興阿李續賓行營另設隨營支應局會同湖北委員經理庶統兵大員不至分心軍需得以一意討賊所復皖省州縣除緊要關隘外必難處處代守應及時設立官長舉行團練以資得力至湖北分戰分守月餉二十六萬有餘加以每月協濟湖口彭玉麟吉安劉騰鶴等軍餉二萬餘兩七年設局造船製辦軍火軍裝本年二月後九江之雲梯地道工費俱繁卹賞尤鉅卽如兩月之內費火藥礮子各五十餘萬斤其餘軍裝無一不取給於鄂省每月所需已逾三十萬兩其分濟李孟羣李元度各營軍餉尙不在此數內本省竭力籌畫實已不遺餘力查山西

陝西四川每月奏定協餉各五萬兩均未如數如期以東征江皖五萬餘人之食責之湖北一省力實未逮應請飭下四川山西陝西迅速協濟庶東征之師免致匱乏 上諭軍機大臣等前因楚軍攻克九江諭令李續賓統領得勝之師馳赴六安會剿其宿太一路賊匪卽令都興阿統兵勦辦本日據官文等奏九江湖口等處由鄂省分兵防守李續賓擬酌帶兵勇渡江先清皖北再議皖南並於九江設立糧臺轉運軍火等語所籌進剿機宜與前降諭旨相符其以九江爲扼要更屬切中形勢卽照所議辦理惟九江道沈葆楨久在廣信深得民心見在江西賊匪竄入浙境廣信郡城正當喫重沈葆楨尙未可調回本任所有九江設立糧臺著官文胡林翼另派廉幹大員妥爲經理至楚兵深入皖境米糧軍火必須地方官員隨同照料呼應較靈卽著福濟派員繞道分赴都

興阿李續賓行營設立隨營支應局會同楚省委員辦理其糧餉等項恐皖省無從措辦仍著由湖北籌撥接濟至各州縣克復以後自難處處畱兵防守著卽責成福濟慎選賢良安輯難民辦理團練自行保衛儻有竄匪卽由皖兵策應方可以次肅清福濟務當振刷精神悉心籌畫以期相與有成將此由六百里各諭令知之○諭福興奏衢城連日獲勝情形晏端書奏處州失陷見籌堵扼各一摺前因常山失守玉山聲息難通福興專顧衢州恐與江西隔絕特命該將軍將原帶之兵酌分一半回駐玉山並派周天受督辦浙江軍務今覽福興及晏端書奏報似皆未接奉前旨而軍情旦夕變遷處州旣陷周天受已遠赴東路福興在衢尙能疊獲勝仗著卽暫畱該郡俟東路賊情稍鬆周天受力能兼顧全軍該將軍再赴玉山賊旣闌入處州金華喫重又有龍游防堵兵分

力單深恐難資禦侮桃花嶺爲由處州下竄要隘明安泰旣由此前進卽著嚴扼北路俾賊眾不能竄出金華然後周天受親統全軍分路進剿可期得手衢州雖獲勝仗而江常兩路匪徒源源踵至著該將軍督飭饒廷選等奮勇進剿漸次廓清該撫所調甯防勇一千二百名並江南撥來周天培所帶兵勇一千餘名指日到浙江西所撥兵勇一千餘名亦當調到兵力實已不少總須布置得宜方能兼顧周天受膺此重任著與晏端書統籌大局以保全浙將此由六百里各諭令知之○諭官文等奏請飭四川等省協濟軍需等語湖北省進剿江皖賊匪派出兵勇約有五萬餘人月費軍餉爲數不貲見在九江郡城業已克復李續賓等卽日移師東下越境追剿埽蕩皖省南北兩岸賊蹤正資得力餉需尤不可缺四川山西陝西每月協濟湖北軍餉銀各五萬兩據官文等奏

本年惟山西解到一萬兩陝西解到二萬兩四川解到三萬兩欠解尙多難資挹注自係實在情形著王慶雲恆福曾望顏查明各該省應解湖北軍餉迅速陸續籌撥解赴湖北以濟要需將此由五百里各諭令知之○譚廷襄等奏夷船退至三岔河靜候欽差會議旋復據呈遞四國來文以欽差大臣必須有全權便宜行事銜名如從前耆英者方可會議否則仍欲進京竟由陸路行走儻有人闌阻卽行抵禦奏入 上諭前因各國有懇求事件譚廷襄等辦理不善特派桂良花沙納馳往天津妥籌商辦惟據各該國照會尙以桂良等不能作主爲疑著桂良花沙納剴切開導如果事在情理真心戢兵但於中國無傷者定可允准不必更生疑慮桂良等經朕特簡務須慎持國體默察人情除非禮相干各款外有應行便宜行事之處卽著從權辦理勉之○譚廷襄等奏夷船

退回三岔河待撫因天熱暫住望海樓空屋得旨住房寶豫爲通商地步不聞居民有起而阻之者人心若此可勝浩歎又奏請嚴防陸路北竄臣誓與津存亡得旨汝節制全省豈止守一津郡若如是自誓實爲有負委任如大局何不料汝竟有此想乖謬已極

○派八旗護軍營兵八百名左右翼兵各五十名交正白旗護軍統領伊勒東阿統帶前往通州聽候科爾沁親王僧格林沁調遣

○予湖北陣亡副將張文煥等祭葬世職○丙寅諭軍機大臣等昨據官文等奏九江克復擬令李續賓帶兵先清皖北再議皖南當經諭令李續賓先赴六安本日據朱鳳標許乃普沈兆霖奏浙省軍情緊急請飭李續賓到任卽可辦理軍務等語浙江省自江西賊匪由廣豐竄入後連陷江山常山開化處州等郡邑圍攻衢州上游各府悉行震動見在福興周天受等帶兵分剿兵力本尙

不足李續賓本任浙江藩司新克九江聲威頗壯著官文都興阿胡林翼將皖北一路進剿事宜應派何員接辦熟爲籌酌卽飭李續賓簡帶所部精兵迅速赴浙其應否由南昌饒信直抵常山抑或由蘇入浙路尙可通並著李續賓酌量遵行將此由六百里諭令知之○頒給科爾沁親王僧格林沁欽差大臣關防督辦軍務○賞已革工部員外郎耆英侍郎銜辦理夷務○命兵部侍郎王茂蔭內閣學士宋晉暨五城御史辦理京城團防事宜○命署密雲副都統哈福那署宣化鎮總兵烏忠阿挑選精兵親帶來京聽候調遣○丁卯諭軍機大臣等桂良花沙納於十九日啟程二十一日可以抵津當已會同崇綸接見四國俄米是否仍理前說英佛有何額請想該大學士等定將詳細情形奏報在途矣昨降諭旨賞耆英侍郎銜辦理夷務因道光年間與英夷訂立和約等事

均係該員經手故此大仍令前往辦理桂良等可令委員傳知○
諭昨降旨派耆英前往天津辦理夷務所有文武委員卽著於直
隸地方營汛內調派委用一切奏報文移卽借用直隸總督關防
以資便捷所有議撫事宜專歸耆英辦理譚廷襄毋庸會辦○命
惠親王怡親王載垣鄭親王端華軍機大臣吏部右侍郎穆蔭工
部左侍郎杜翰專辦京城各旗營巡防事宜○戊辰諭內閣勝保
袁甲三奏官軍克復州城並追剿餘匪一摺逆匪踞六安州城經
勝保等督兵圍攻本月十一日該逆出撲官軍新營勝保親督穆
騰阿等各率馬步兵勇分路鈔截繞至鳳凰橋尙家廟一帶迎斬
悍賊百餘名賊眾敗逃次日該逆又擁大股搶過河西分撲鳳凰
橋新集等處營盤副將王鳳祥等分督兵勇開礮轟擊賊眾潰走
官軍分途追殺賊屍枕藉另股接應之賊亦經官軍擊退乘勢趕

殺四五百名其撲擾河東營盤之賊均經袁甲三督飭兵勇擊斃甚多十二日夜間參將賽沙布等繞抵六安搶過城壕爭豎雲梯而上在城內應之許原如楊邦本等將城門大啟兵勇一擁而入賊匪亡命分竄未經逃脫之賊經官兵沿街搜殺三千餘名救出難民二千餘人立將州城克復餘賊擁船下竄經兵勇兩岸截殺無數並擊沈賊船一百餘隻斃賊二千餘名淹斃不計其數生擒張落刑之叔張玉明龔得之姪龔玉及其賊黨多名追剿亦屬得手在事出力員弁紳練著勝保等擇尤保奏候朕施恩○諭軍機大臣等勝保袁甲三奏攻克六安見籌追剿一摺六安既經克復餘孽未盡殲除亟應盡力追剿以淨根株勝保等所帶兵勇勢難爲一州一縣畱守李孟羣已有旨令其前往廬州恐不能赴六安布置前經諭知福濟各州縣克復以後令其慎選賢良安輯難民

辦理團練自行保衛此時該州知州茅念劬既屬得力著卽咨明
福濟令其經理儻有借資兵力之處亦須以皖兵爲主而以客兵
策應皖省州縣旋得旋失視爲故常皆因州縣不得其人殊堪痛
恨此次六安州城勝保等既以全力克之豈可再有疏失前有旨
令袁甲三赴徐宿一帶督剿茲據奏六安餘匪未淨暫難分身著
准其暫緩啟程會同勝保追剿一俟竄匪肅清仍當遵旨前往勝
保所稱相機南下是否先行進剿舒桐見在九江得勝官兵已分
路東下先清皖北勝保等正可會合夾攻次第克復也將此由六
百里諭令知之○添派吏部尙書周祖培刑部尙書趙光工部尙
書許乃普會辦五城團防事宜○調暫駐熱河哲里木盟昭烏達
盟蒙古兵各一千名迅速來京聽候調遣○己巳諭內閣德興阿
奏官軍攻克烏江賊巢大獲全勝一招本月十五日烏江賊匪糾

和州賊匪徑撲石磧橋記名副都統海全協領烏爾恭額等帶兵奮擊追至烏江記名總兵英貴帶領步隊由高旺馳至該逆分股排列海全直擣中堅官軍四面兜裹殲殺殆盡義勇首先薄壘火光四起諸壘悉下河南賊匪復出二千餘名分排南岸我軍過河直撲賊壘居民幫同殺賊岸南各壘亦登時俱毀其由小徑奔赴和州者經官軍追至赤泥壩地方盡力殲除海全馳突賊中手刃尤多共計殲賊三千餘名賊目多名生擒五百餘名斬獲首級七百餘顆烏江賊壘一律踏平剿辦甚屬得手出力員弁兵勇著德興阿彙案會保候朕施恩○諭軍機大臣等僧格林沁奏籌防陸路及運河宣洩事宜一摺僧格林沁紮通州東關外運河兩岸旣與八里橋相去不遠自毋庸移動采育地方旣爲進京要路卽飭伊勒東阿帶兵嚴防楊村係水陸最要之地托明阿在彼駐紮所

有原帶官兵及國瑞所帶之兵均歸併楊村飭令妥爲布置所有弁兵卽著嚴加約束毋許滋擾居民據英隆奏熱河兵丁僅存千餘名見派兵五百名分三起前進此項官兵抵通後著僧格林沁等酌量布置至啟壩洩水必須相度地勢體察民情方爲有益無損山東四女寺等處應派大員前往查勘著烏爾棍泰馳赴山東並諭崇恩派委妥員會同查勘總須與民田無礙方可議及拆壩不可強拂輿情至青縣之興濟城滄州之捷地鎮本係南運河減水壩如可設法宣洩卽飭國瑞悉心籌辦○諭前據官文等奏遵挑荊州駐防旗兵訓練馬隊以資攻剿所辦甚好本日復據德興阿奏於滿營馬隊外挑選臚壯馬匹分派綠營習練臨陣頗資得力等語馬隊一項如果訓練有方雖不及吉林黑龍江之勁銳而於攻剿亦大有裨益見在各路用兵紛紛請撥吉林黑龍江馬

該二省存兵實已無可再調業經諭令德興阿再行挑選馬兵勤加訓練多多益善因思軍營馬隊不敷均可照此辦理既免徵調之煩兼可漸增勁旅著官文都興阿勝保袁甲三福濟德安伊興額史榮椿等各就所部兵勇中挑派精壯兵丁操練馬隊以期得力將此由六百里各諭令知之○諭見在江北勦辦逆匪正當喫緊之際各路督勦馬隊不敷應用著樂斌於陝甘督提二標下挑選馬隊二百名派委得力將弁並軍裝器械迅速管帶啟程前往德興阿軍營聽候調遣毋稍遲延並著樂斌酌量情形如能於二百名外多爲添撥更足以資攻勦將此由六百里諭令知之○以頭等侍衛托明阿爲直隸提督已革提督張殿元畱營差遣○庚午調察哈爾備用馬二千匹解京○辛未諭內閣蔣霽遠奏官軍進攻獨山州城大獲勝仗生擒首逆一摺二月十七日貴州大股

賊匪由中安等處竄攻獨山州城署知州侯雲沂調兵集團開城夾擊賊始紛紛奔潰我軍乘勝追殺伏練齊起四面兜圍殲擒賊匪殆盡陣斬賊首二名殲斃賊目一百餘名夥賊三千餘名生擒著名首逆沈大六一名僞將軍等四十二名就地正法另股賊匪盤踞州屬卡榜擺旁一帶復被團勇擊敗勦辦尙屬得手出力員弁紳團著擇尤保奏毋許冒濫○諭軍機大臣等見在托明阿帶兵駐紮楊村該處爲由津至京水陸最要之地著瑞麟前往查看托明阿如何布置如有偷豫未周之處著會同商辦以爲僧格林沁前路屏蔽見在惠親王等奏明於京師城外分紮十二營尙無總統大員瑞麟俟布置楊村一帶前路妥協後卽著來京總統各營事務並著僧格林沁傳旨咨調西凌阿前赴通州幫同僧格林沁統帶官兵其山海關察哈爾官兵卽著僧格林沁另行派員前

往管帶將此諭令知之○諭何桂清奏浙江軍情緊急請飭和春督辦江南浙江軍務一摺浙江賊勢東趨處州既陷逆欲益張先後由金陵大營撥去兵勇五千餘名徽甯兩處援兵亦已逾萬前經降旨令總兵周天受督辦浙江防剿事宜該員見在嚴守金華恐難兼顧江蘇浙江唇齒相依設有疏虞有礙大局和春圍攻金陵布置已屬周妥著卽馳赴浙江督辦江南浙江兩省軍務總兵周天受著幫辦浙江軍務所有江南安徽江西援浙各軍均歸該大臣節制以一事權前命李續賓帶九江得勝之師赴浙援剿亦著歸和春調度和春赴浙後所有江南軍務卽著張國樑許乃釗暫行會辦俟浙江軍務辦有就緒卽可責成周天受專辦和春仍馳回金陵該大臣聲威久著見在竄浙之賊乘其巢穴未固分飭各路帶兵大員一鼓殲除以保東南大局朕有厚望焉將此由六

百里各諭令知之○諭前因伊興額等奏徐州喫緊曾飭崇恩酌抽郊嶧防兵赴徐協剿本日據崇恩奏逆捻窺伺東境業已越過徐城東省邊防緊急不能撥兵赴徐並請飭徐州大軍會合兜剿等語據稱捻匪劉狗等率黨數千竄擾碭山豐縣各處大股又由徐州北面至豐縣之趙莊隋家集等處蔓延八九十里築圍紮寨四出搶掠又有逆眾千餘竄赴單縣之馬良集地方並有馬賊二百餘人意圖過河雖經東省兵勇斃匪多名崇恩已派副將郝上庠等前往堵剿惟捻勢鴟張北竄堪虞東省兵力尙單必須大軍合力兜擊著伊興額史榮椿迅速統兵繞出賊前會合山東官兵併力兜剿毋稍遲延至此股捻匪本由六安竄出見在六安業經克復著勝保迅卽撥兵赴豐沛一帶接應袁甲三前本疊降諭旨令赴徐宿一帶督剿此時東境告警仍著袁甲三剋日馳往督兵

會合剿辦以杜北竄將此由六百里各諭令知之○諭前因徐州賊勢甚熾諭令英桂等撥陝甘兵一千名馳赴徐州並諭豫省如尙有可撥之兵卽就近酌量調往以資協剿本日據崇恩奏逆捻業已越過徐城東省邊防甚急雖經崇恩令郝上庠等前往堵剿惟兵力尙單必須鄰省撥兵合剿且捻眾旣在豐縣等處紮營一經過河非北犯東省卽直趨歸德見在歸陳情形想尙不十分喫緊著英桂等卽飭德楞額督兵馳赴豐沛一帶會合伊興額史榮椿等併力兜擊務將此股捻匪迅速埽除以杜北竄卽以固豫省藩籬是爲至要將此由六百里諭令知之○諭蔣玉龍奏懋陳黔省軍務情形請飭鄰省撥兵濟餉一摺貴州苗教各匪蔓延鎮遠黎平都勻麻哈思南各府州以及近省各州縣分踞險要出沒無常分兵防剿兵力已形單薄加以協餉不敷餉項口糧積欠不少

勦辦更形棘手著王慶雲籌撥餉糈迅速解黔或能分撥兵練相機助勦更爲得力並著駱秉章酌調兵勇赴黔會合蔣玉龍所帶川兵逐節進勦以清全黔伏莽卽以固川楚藩籬是爲至要將此由六百里各諭令知之○桂良花沙納奏英人聲言必須允其進京方能在津議事俄人願向各國說合俟議定後再行進京瞻仰並無他意奏入命桂良花沙納告以速將各條定議妥協並將兵船退至攔江沙外進京應行禮節彼此商定並諭耆英將三國所求之事妥爲酌定○展京師內城六門外煮賑三月○甲戌諭軍機大臣等前因徐州捻逆分擾蕭碭關入豐沛當諭英桂迅撥陝甘兵一千名前赴徐州助勦本日據英桂等奏豫省存營兵爲數無多陝甘官兵見赴歸德防勦難於調撥其後起陝甘兵一千名業已派赴勝保軍營請飭調赴徐州等語見在六安州城業經克

復徐宿逆猷鴟張萬分緊急自應亟速援應著勝保卽將前項陝甘兵一千名交袁甲三統帶前赴徐州至豫省歸陳情形雖形喫重而徐州毗連豫界尤應不分畛域以剿爲防著英桂等卽飭朱連泰迅速帶兵前進會同伊興額等合力剿辦如歸陳情形稍緩仍飭將弁探明賊蹤出境堵截不得專顧本境致令蔓延將此由六百里各諭令知之○諭福興奏衢州軍務情形並請催江西援軍及酌畱兵勇協守玉山廣信一摺衢州賊匪蔓延東南兩路因連日大雨官軍未能進剿所有李定太一軍昨據耆齡奏稱該總兵已於四月初一日拔營前進俟行抵玉山卽將駐紮該處之長左等營練勇一併統帶赴浙此項官軍除已由福興檄令酌畱一千名歸沈葆楨等調遣其餘兵勇爲數不少本日已諭知耆齡催令迅速前進浙省軍務昨已諭令和春前往督辦福興本擬俟衢

州解圍後馳往玉山但見在江西兵勇尙屬不少福建自連陷浦城松谿政和後近復攻破光澤竄擾邵武兵力較單不敷剿辦著福興俟衢州解圍後卽將原帶官兵五千名內分出二千五百名親自統帶赴浦城一帶相機進剿以分賊勢而靖嚴疆將此由六百里諭令知之○諭本日據王懿德慶端奏閩省軍情緊急籌辦大概情形各摺片江西逆匪竄陷浦城政和松谿後復陷光澤並有竄入邵武之信建甯逆氛四逼該督等調派精兵馳赴延平防剿以固省垣門戶並催令速克政和等三城以免爲賊牽掣所籌均尙妥協江長貴因甯國軍情喫緊業經調撥赴援周天受調度全浙軍務見在會同明安泰力扼金華斷難派令赴閩惟福興帶赴衢州兵本有五千前有旨令其將一半歸周天受調度一半由福興統帶回玉山駐紮嗣因衢州一路周天受未能兼顧令其暫

緩啟程本日已諭知福興俟衢州解圍後卽帶所部兵二千五百名馳赴閩省助剿該督等惟當嚴飭在事文武先就見有兵力實力堵剿將失陷各城次第克復毋得專待援兵致滋貽誤將此由六百里諭令知之○諭前據耆齡奏派總兵李定太率同參將文瑞等帶兵勇四千餘名赴援浙江行抵玉山後再添帶長左等營練勇合力進剿本日據福興奏已飭李定太酌畱新衡勇及兆字營一千兵勇駐紮廣信而飭催李定太全軍速赴衢州等語李定太已於四月初一日拔營啟程據晏端書奏報亦稱不日可到惟衢州無須多兵此外浙江需兵之處尙屬不少自應酌量分布昨已諭令和春兼督江浙兩省軍務著耆齡卽飭李定太一軍迅速前進飛咨和春調度爲要將此由六百里諭令知之○桂良等奏英國所求條款連日派員面議分別准駁而該國要求各款內如

鎮江漢口各處通商並由江通海各處任憑伊國隨時往來要緊地方由伊國設領事官懲辦不法之徒其情形似非全准不可奏入命耆英正言駁斥僧格林沁相度要隘安速布置○命盛京將軍慶祺選兵二千名備調○是月緩河南禹州等五十三州縣被水村莊新舊額賦